



Zataconé sado-maso. Ale są ti Pòlòszë dzywny...

TÓMK FÓPKA

Wcyg sã jima co nie widzy. A to kaszëbszczé tóblëce w kaszëbszczi stolëcy, a to, że cëczter szedł w górã, a to, że sąsòd mò nowi autòł...

Wcãg le jamrëjã i jamrëjã. Ksãdz miòł za dludżé kòzanié – jamrëjã. Białka przëpòła zupã – jamrëjã. Padò deszcz – jamrëjã. Swiëcy słuńce – jamrëjã.

Amerikòn, czej gò zapitòsz: How are you? (Jak sã miéwòsz?), òdpòwié colemało: „I’m fine” (bëlno). Pòlòch, ga gò zagòdòsz, zacznie sã jiscëc: tu mie bòli... matò wzãtkù datò... nie zdãżił jem na autobus... ta mòłpa blaszanò mie z klatów szopã zrobia... nié tegò zãba mie wërwelé itp.

Nie pòtrafiã sã ceszëc. Fejrowac. Swiätowac. Në chiba, czej kòmu co sã zle stónie... Ale nôprzòdka, tak dlò òka, żatujã. Ale jak żatujã...! Tidzeniama. Kò je wiedzec, że lepí, czej lëchò cëzymù pùdze, a nié mie...

Pòlòszë są smùtny i kòmuðny. A czëmù mò bëc jinaczi, czej narwetka na swiãta wëbiërajã sobie ne nôsmùtniészé roczëznë? Jiny nôrodë sã ceszã z wëgròny czile stalat temù wòjnë, biòtchi, a ti tu jidã w historiczné sado-maso.

Co je redotnégò w tëch państwòwëch swiãtach?

– 1 maja – Swiãto Robòtë (tec nôlepi swiätowac w kòżdã niedzielã);

– 3 maja – w òsmenòstim stalatim Pòlòszë wëmëslëlë drëgã pò amérikańsczi kònstytucjã – ne i co nama z tegò, czej dzysò ni mòzëmë wëlezc z redotnégò ùtwòrstwa prawnégò nôleżników parlameńtu...?;

– 11 lëstopadnika – Swiãto Samòstójnotë – a to më jesmë samòstójny??

– 1 zëlnika – Dżëń Pamiãcë Warszawszëgò Pòrëchù – a jak to sã skùńcza? Bël mòże z te jaczi hepí end?

– 15 zëlnika – Swiãto Pòlsczëgò Wojska – mają òni przënomni jaczé fligrë, czòldzi, òkrãtë. Czej leno piechti pò nym Afganystanie wanożã bez patrónów i granatów...? A co òni tam w całoscë robiã...? A chto nas bróni?!

– 31 zëlnika – Dżëń Solidarnoscë i Wòlnoscë – dójta pòkù z tą Solidarnoscã...

– 1 sëwnika – Dżëń Weterana – jesz pòrà lat i òdińdã òstatny weteranowie II swiãtowi wòjnë... Chto tej bãdze kòmbatantã? Wiedno sã jaczi, wierã, nalëze...

– 14 rujana – Dżëń Szkòlnych – warkòwé zwiãzczi i kùratoria rozwiãzac, szkòtë sprywatizowac! Nié kòzdi mùszì bëc sztudrowòny i nié kòzdi mòże ùczëc!

– 16 rujana – Dżëń Papieżã Jana Pawła II – kùreszce cos na plus. Nòlezi sã Mù chòcle za to, co zrobit dlò Kaszëbów!

– 21 lëstopadnika – Dżëń Socjalnégò Robòtnika – socjal prëcz! Zgniëlców, òbòlëwców, òchlápùsów i szlìnzdrë do robòtë zanëkac! Nié blãznowac zasylkoma czë jinyma wespółkoma za nick-nie-robienié!

Òptimistné na pewno je to, że dzël z tëch swiãtów je wòlny òd robòtë. Dzël z nich pòkriwò sã téz z kòscelnyma swiãtoma. Mòże tej, pò mszi mò sã rozmiòc – jaczëgò tesco, reala, klifa czë geanta narwiedzëc. Cãżkò przëzarobioné dëtczi w biédné, europejszé firmë zajinwestowac...

I ju mòżna wròcëc do codniowégò jamrowaniò... ■

Słowòrzk:

zataconé – ukryte; **cëczter** – cukier; **jamrëjã** – utysku-jã; **colemało** – zazwyczej; **ga** – gdy; **jiscëc sã** – żalić się; **wzãtk** – dochód; **z klatów szopã zrobia** – nieudany efekt wykonania tzw. „trwałej”; **fejrowac** – świętować; **dlò òka** – na pokaz; **kò** – przeciez; **lëchò** – źle; **kòmuðny** – gnuśni; **roczëzna** – rocznica; **sado-maso** – skłonność do dawania i czerpania przyjemności z bólu; **samòstójnota** – niepodległość; **pòrëch** – powstanie; **mòłpa blaszanò** – tu: niedobra kobieta; **sëwnik** – wrzesień; **wierã** – pewnie; **wiedno** – zawsze; **rujan** – październik; **szkòlny** – nauczyciel; **warkòwé zwiãzczi** – zwiãzki zawodowe; **sztudrowòny** – kształcony; **kùreszce** – nareszcie; **chòcle** – chociaż; **zgniëlc** – leń; **òbòlëw** – hipochondryk; **òchlápùs** – nałogowy pijak; **szlìnzdra** – kobieta nie szanujãca siebie, fleja; **zanëkac** – zapëdżić; **blãznowac** – narowić; **wespółkòzci** – zapomogi, zasiłki.

www.fopke.pl